

石雲山人詩集

石雲山人詩集卷八

西曹詩存

辛未壬申癸酉甲戌
乙亥丙子丁丑戊寅

南海吳榮光伯榮

辛未春攜羅浮蝶繭至京師四月朔日繭破出雌
雄兩大蝶越宿飛去相傳此蝶雖走萬里必歸
故山也好事者繪爲圖卷宋芷灣同年湘作詩
與余各有歸志遂爾奉同

我欲問四生色空無受想蝶兮偕汝來世界同偃仰長
安多貴人福慧文字享以汝爲鴻儀斯世在所獎以汝
爲羝角君子則用罔黃塵隔天南香草日夕長昨宵歸

夢遙春風度靈掌招汝白雲深娛汝紅泉響萬花玉女
峯千歲仙人杖良時不再得栩栩逝將往以茲懷歸心
勵我懷祿黨迷途幾寶筏遠水多畫槳吾生信有涯漆
園結孤賞爲蝶與爲周胡事久埃鞅愛此龜曳尾笑彼
雉羅網况吾無用物樗寄何不廣他年訪汝來請蠟阮
孚綱

和馬秋藥前輩

履泰

題羅浮蝶圖

四百芙蓉轉盼非山中芳草故人稀夢回石室烟霞氣
春到瑤京錦繡衣天上鴛鴦任高舉江頭鷗鷺正雙飛

七千里外來時路遲我他年倦翮歸

閒身

車馬聲多在四隣三間老屋一間身
歎風炙手如權吏
夜雨關心似故人最近酒家能買醉
每逢花市畏言貧
白榆前夕秋河曙仙露清涼過去因

李蘭卿舍人

彥章

歸娶仿史溧陽秋颿歸興圖索

詩二首

吟肩親接紫薇郎說到君家蕊榜香
回首丹山桐樹老

清聲雛鳳正求凰

蘭卿之尊甫與余
戊午鄉試同年

半幅垂楊溧水程餘波綺麗接甌瀛囑君一路歸颿好
到日秋河案戶清

錄囚篇

天網豈不恢斯民多犯之厥性本皆善彼愚誠無知或
爲飢寒迫或爲小忿移一朝覆忽發拘繫羅庭陲霜風
堂上來隸卒怒相持鬼語在衾影人聲雜鞭笞示威亦
何難恐勿盡其詞我非明允才願爲慈惠師噬則雷電
合解則雷雨施腊肉縱有毒剝膚良足悲凜此死生際
用斷貴用疑譬如子女病宛轉求良醫膏盲將奈何瞑

眩仍相期又如八井孺從救既難爲念其習坎陷行人
猶涕洟况當我得爲疇不爲再思國章宥所難厥辜乃
自罹傷哉辜自罹雖悔其可追爰書一以定撫中長吁
噉緬維張歐誠官屬無敢欺又維卓茂寬道路不拾遺
孫章誤非矯蘇章公忘私安得舉世人察決皆如斯耿
耿明愼心青燈危坐時

種松四首

移廣仁嶺小松植灤陽行館因賦

朔風吹夕蒼蔚然見嘉木百卉淒以謝而汝生意復白

雲沒前峯皓月暖空谷各有歲寒心照我詩人屋
古寺或繫馬大江能挽牛蟻喙穴其下鸞鳴枝相樛天
生有用材顯晦安所尤但爲貞厥榦百尺凌高秋
與汝一漑恩勵汝千秋節繁華亦何常正直誰能折昨
夜塞山寒中有太古雪寄語同岑苔歲月心如結
種樹如人壯種人如樹老天心栽者培植節苦不早昔
從泰岱來蕤森在行道以茲百年計誰與論懷抱

癸酉正月十九日

絲酣竹醉筵初罷月出星寒漏未中七載玉珂勞問役

開珊今夕試燈風

李芝齡太史

宗昉

偕友遊陶然亭飲于李芸甫水

部

秉綬

齋聯句余未與會芸甫補圖屬題

我昔城南遊江亭豁雙目呼酒淘嵇阮攜詞命潘陸當
其放眼時邱山等華屋又念此身中策肥甯驅犢雖無
故山適十得其五六春秋每清暇泉石息紛逐世多有
用才我保無名樸斯亭亦長存歲月老松竹豈期墮塵
鞅渺如三天竺遂令今視昔傲我好林麓問我現在境
驢背途能熟問我過去因蠶絲韻已覆胡不從之遊而

不
爲一官束東風催兩旬迤邐游疆速荒臺客徑開佳日
朋簪篤放浪無俗士繫維有空谷招邀水部家杯觴婪
尾續主賓履既洽醉舞巾亂撲文章金馬豪意氣玉山
簇快君奮筆前橫掃墨痕宿春色多于人一一入詩腹
披圖發長歌爲君盡十斛舊事星度留畏塵如蜩縮他
時訂重來此約願有復請語亭前草認我勞人躅

題王藝齋編修

家相

簪花寫韻圖

爛熳雙株照眼頻枝頭爭比穎頭春墨緣畢竟歸名士
詩品應須似美人東晉風流真後嗣西山福慧憶前身

瀛洲多少霓裳譜不及君家筆有神

葉東卿上舍

志說

以林和靖梅鶴圖易余汝帖後

七卷二首

七卷添標顧氏圖

東卿藏前五卷有牧山草堂圖此七卷恰爲補足

晉唐書派

待操觚鶴馴梅瘦詩人老得似山陰筆法無

汝州賓館秋風冷

此元明之間拓實在范巡道搜訪馬廐瘞石之前

孤嶼仙廬

夜月荒珍重人書已零落墨緣各向枕中藏

葉東卿藏司馬溫公與兄子書碑硯二首

事君資敬盍先求何物官中足繫留此是宋家忠孝字

令人揮翰說甯州

十八行餘半八行古碑今硯接心香裝成合入傳家集
好祝君家愛日長

懷柔道中

塞雲欲曙塞霜濃日出天東第幾峯地有關山長設險
野無戰伐久歸農百年社鼓先疇服九月幽衣比戶封
記取前村秋色好酒帘開處客扶筇

灤河

秋氣入郵程灤河夜有聲山雲自來往塞月最澄明白

草金溝館黃花石匣營舊時征戰地行客話銷兵

和祁竹軒主事填青石梁韻

積翠凌空輦路開石梁高矗倚崔嵬手撐日月諸天近
履聽星辰五夜來絕頂風聲真浩渺下方雲氣自低徊
此行好倩如椽筆收取荆關畫境回

常山峪

去歲常山峪行營記舊蹤山雲迷虎穴野火炙駝峯今
日征郵至歸途猶典逢迎

鑾轡日近指點喬華重

同台綏之

福

琦靜菴

善

祁竹軒琳霄古亭登高望

雙塔峯用杜藍田九日韻

雲山面面盪胸寬與客攜壺話古歡
秋色共紉蘭芷佩宦情休問鷓鴣冠
殊方場圃霜初晚故里田園露正寒
記取雙峯如塔影明年可有再來看

九日同人登高用陶己酉九日韻二首

行役方五日倏然清節交百卉淒以腓
四野綠未凋水草邨姓聚風雲天宇高
逸馬求其羣飛鴻鳴在霄言偕素心侶
登山憇塵勞俯仰聊自適何論榮與樵
偶因寄

所託於焉詠斯陶凜凜歲漸寒授衣塵晨朝

寄櫟吾莊周食粟吾曹交本無求營志誰能知其凋報
國賢才多于逵儀羽高翾翾鳴朝陽旦旦賡卿霄而我
官廩縻甘爲塵鞅勞自非賈傳才豈作湘纍憔悴故鄉久
泰平斯世真義陶願言各自愛與子話今朝

小醜三首

癸酉九月

小醜如鼃鼠跳梁伺禁門奸閹收白布狡窟聚黃邨雷
雨天心助風雲

廟算尊一鎗摧拉迅况有

智親藩

鉅已籠中則魚仍釜底游
首渠宋庄得遺蜜滑臺收杖
杜旋三月烽烟靜九秋煌煌

廷訊日千里送俘囚

逮事雲司客寬嚴貴得情
星霜方待旦燈火正嚴更
詔許梟鸞辨衡須雀燕平
爰書森要地敢告慎刑名

過登瀛門作

怊悵羸驂過亦嘶五雲深處近瀛西
鈞天協律朝陪宴
璧月飛觴夜命題
往事思量真刻鵠壯心孤負此聞雞

玉河橋畔恩如水盡是飛鴻雪爪泥

由南口至居庸關作

北嶽連并薊分青到此門風雲關塞色沙石虎狼屯漢
成成村落秦城等牖垣書生太平福何必屬橐鞬

暑确

暑确如奇鬼當輪欲攫人鴻毛輕此命鵠羽重思親邊
塞將三載崎嶇匪一身教忠言在耳叱馭莫因循

居庸關

上京西北翠屏開夕照蒼涼古戰臺鐵騎幾人籌戍役

琱戈今日盡邊才
衝湍夾磴天重險
漢壘秦城地幾恢
何似

聖朝中外一衆藩
瞻日欵關來

雨晴度八達嶺

西去雄關第一盤
關風伏雨洗征鞍
人穿亂石隨雲出
天引諸峯透日寒
古戍三邊思壯士
畏途百折感羸官
城南丹鳳音書近
莫作刀環出塞看

由胡家屯至懷安六十里

亂磧烟將暝蒼茫
八夜程坡泥防汨
沒山影愈崢嶸
水

火沿門乞飢寒到曉驚

國恩猶未報珍重慎吾行

土木懷古二十韻

漢日澹將夕狼山攬轡行風沙懷故戍土木有空營往
者秋防急西陲患氣搜六師奄宦掌孤注鬼神偵指顧
羣公懼安危萬乘輕烽烟連御帳輜重待荒城古井人
誰拜嚴圍敵必爭竟傷全局覆肯信載書盟歎息雄狐
蠱淒涼敗馬鳴燕屯軍士怨芟舍主臣驚劍詎中黃奮
星先太白明金繒他日議組練此時征介弟推賢長元

戎屬老成一言定宗社諸路衛都京國罽龍蛇歲邊才
栲栳兵三關歸玉輦八載正璇衡觀象門方奪論功位
已迎紛紛復權倖落落畢忠誠舊事如棋奕遺民盡鑿
耕壯猷慕前哲不必計陂平

雲中和韻

澗雨坡苔漾碧浚登臨秋色送將還我攜畫筆君詩筆
記取雲中一角山

雲中立秋

天風吹冷古雲州一葉難隨往迹畱雨露百年知向化

烽沙諸堡憶防秋塞門羈旅刀砧急部曲承平劍戟修
今夕城南下弦月有人倚遍最高樓

雲中早發

又是泥鴻一爪痕馳雲回首感邊垣關山鼓角征人返
文武衣冠使者尊見說馮唐多將畧甯聞魏尚議軍屯
太平兵馬休輕廢囑爾熊羆念

主恩

和翁覃溪先生

方綱

論嶺南詩韻二首

權謳漢苑好音遐憶到開元宰相家信與暉昇高擁騁

又于孫趙啟英華雲司寂寞懷人草

謂梁公實比部

海國迢遙

在水霞一卷潞河詩筆最玉臺風月湖無涯

余藏有白沙先生潞

河詩蹟

一卷

欽州詩與邕

去

州詩都作餘波綺麗爲詎謂蘇齋刪定

意已開粵嶠見聞知三江望氣衣冠盛十載懷歸笠屐
遲獨對千秋朱鳥影前賢何者是吾師

七夕二首

北斗參橫夜向晨秋心三日又懷人勞薪自領悲歡味
逸竹誰傳遇合因蘭橈夷猶湘水女桂旗倚徙洛川神

鵲橋倘是通靈物不費黃姑貨聘緡

宮闕蓬萊浪渺漫誰將天巧乞河干仙家殿幄心通易
人世車塵膜拜難福到庸庸真有幸緣稱世世詎無端
網絲蟾子殷勤甚拙宦潘郎興已闌

中秋憶月東汪筆山郎中

如淵

最好宵分彈指過匆匆會訂詠霓歌小時不識今將老
天上增寒人若何看遍鬢雲防慧減吹來絲雨奈愁多
斲輪一樣神仙戶心苦甯期鑒素娥

戒行

戒行未明就道午日出人事紛如土道旁老柳悄笑人
秋水時至誰問津欲渡無梁逐水曲左阡右陌迷吾轂
吾非朱公胡爲哭行行四野雲氣濃是昏是雨吾亦蒙
草樹連縣天之東驅之驅之將焉窮一星燈光在半里
瞻烏咸曰於爰止塵羹土餽挾箸起各勞去臣朔饑欲
死吁嗟乎臣朔縱饑何至死請看飯牛有人漫漫夜方
始

密雲道中

重拂西風衣上塵此生端合作勞人三秋澗雨橫斜路

四載邊雲去住身疲馬衫痕多古磧病蛩燈影在東隣
沿途却喜豐年景場圃初登慰我民

古北口

危梯絕塹古之北我

皇撫之如戶闕秦城漢戍紛戰爭唐鎮明邊但荆棘此
口由來天設險捫參歷井不可陟碧竈千層山海遙蒼
烟數點居庸識潮河之源興州來萬巘摩肩窺汨減下
臨怒號之奔湍上矗微茫之斗極中通盤紆僅容輶飛
鷹欲擊垂其翼一夫當關萬莫開智者無謀勇不力猿

鶴沙蟲幾摧死風雲日月互憑式地接三邊白漠痕天
畱萬古青山色

屬車秋獮歲來臨虎伏龍蟠不敢顛天門岩巖誅蕩中
翠翎黃褶紛環翊洛迦度世衆生福

元樞在手羣藩職奔走偕來悉

主臣幅幘中外無畛域乃知所守不在險雲梯石棧空
凌逼請向

皇輿話太平

寶命煌煌歸有德

黃土坎

石乃土之核水流而不盈以此習其坎坎坎相紆縈昨
日秋雨至今日秋雨晴雨晴豈不佳泥滓傷我征僕夫
不敢前控轡心忤忤危轍較分寸惡磧紛猙獰我前疲
馬喘我後奇鬼偵失手千丈落性命毋乃輕戒懼非臨
時遇險安足驚入坎復出坎所占惟心亨

至熱河作

笑看青山一點頭故人曾此記淹留一官傳舍如前日
雙鬢關河又幾秋暮靄鍾峯依梵宇曉寒斲水溯仙洲

澄鮮嵐嶺

山莊景也向朝班識

豫遊

由熱河至中關作

晨策灤之陽灤水流潺湲日出灤水清日午灤水暄沙
瀨三五里草橋八九存微霜暖前林炊烟依遠村道旁
土店開乞漿人在門下馬飲溪澗解衣坐雲根獵騎從
東來連鵲多懸貍一見各慰勞握手相寒溫莽莽風雲
氣茫茫沙漠痕我行方八日今日晴且暄沿途事探陟

車馬甯云煩詰旦整腰脚秋色紛嶮嶮

靈邵亭

保

見和至熱河之作疊韻答之

看到霜林衆嶺頭如斯山水足遲留神皋形勢收羣部
上塞風雲報九秋浪跡君應悲白髮清吟誰欲傲滄洲
蒼茫萬疊天涯路漫把驚人句紀游

廣仁嶺登高分賦得登字

一聲長嘯豈孫登放眼蒼茫旭日升木落山高方曉慄
雲閒天澹又秋澄灤河瀉潄如杯飲塞嶺峯巒作檻凭
不望家鄉望關市

皇仁百載遍林蒸

癸酉九日同台綏之琦靜菴祁竹軒喀拉河屯登
高今日復經此地靜菴提刑中州竹軒留官京
邸惟余與綏之同來因疊前韻示綏之兼懷靜
菴竹軒時乙亥九日也

無邊秋色入眸寬佳節重懷握手歡作客漫勞宣武酒
論交却憶惠文冠苦匏入水誰同濟老檜凌霜久耐寒
三載山靈憑証取茱萸此會兩人看

塞菊

灝氣滿沙磧此花開未闌秋心殊落落傲骨自珊珊日
月無私照風霜有獨寒可憐蘇武節辛苦後人看

、秋興八首用杜韻

隨扈熱河作

浩蕩天風吹暮林黃沙白漠草森森雲山

蹕路三秋候燈火

離宮萬壑陰拙宦敢辭行役苦微才終効報

恩心四年關塞詩人筆未向城南賦夕砧

山盤谷崦路紆斜秋鬢勞人感歲華半載已孤津北節
九年猶記浙西槎使星前後徒過留邊月蒼涼獨聽笳

第一

君恩忘不得衛河清水越湖花

香爐曾得侍

宸暉官好宵嫌鶴俸微西掖聞鐘初月出南臺待漏曉
霜飛握蘭趨走人將老列柏蕭條事已違若向吾生論
撫仕爽鳩誰瘦豸誰肥

玉局羣仙一局棋升沉變幻不須悲關心秋雨泥塗地
回首春風鎖院時

黼座開筵晨宴洽瓊函宣賚午鞍馳昂藏七十三人裏

已未同年入翰林
者凡七十三人

高厚涓埃各重思

小草依微記出山五星明聚降婁間

已未四月朔日五星聚奎

新名

鴈塔朝題壁舊侶霓裳夜掩關自謂飛騰接前輩甯知
荏苒此塵顏廣仁嶺外山如笑笑指當年侍從班

苦憶罍觴津水頭官如敗葉一驚秋艱難歸計庭闈遠

少壯離懷弟妹愁萬里風塵酬肅鵠半湖烟雨欲盟鷗

劇憐兒女長安月歲晏相望嶺外州

庚午歸省時家口俱畱都中

自笑蝸名與狗功匆匆都已付塵中憐才一老空荒土

謂朱文正師

仗義諸君有古風

諸戚友爲納貲復官

蒲質望秋先欲謝

葵心向日又初紅
木蘭辛苦郎官策
失馬頻年悟塞翁
才過天門卽衍迤
世途于此識平陂
露濡霜染千林樹
竹嘯松吟百尺枝
道路短長秋氣改
關山遲暮壯心移
夜闌笑倚穹廬看
列宿芒寒斗柄垂

紅樹十首

由南天門出古北口至廣仁嶺紅葉滿山人跡
在地朝暾暮頰各有會心可不來寄之子墨
時嘉慶丙子霜降前十日也

侵曉霜華照客身。緣厓度嶺。匝時祈天。心到此一烘染。
物意行將見。本真鬢髮未衰。應笑我文章。垂老更驚人。
停車珍重。從頭想。只隔菖芽兩月春。

連朝不覺入山深。晴日暉暉。正滿林澹抹。嵐頭方縹緲。
濃濡露腳。漸侵尋。已添菊葉東籬色。可識梅花隔歲心。
萬樹淋漓。元氣在。搓朱成絳。總能任。

萬里長天。萬里沙。松青草白。更無花關心。流水多斜照。
回首空山有。落霞優鉢。火光疑佛地。幔亭雲影。或仙家。
寄焉已分。人間老更乞。何人辨月槎。

指點山痕與水痕詩心容易近黃昏亂鴉初起客攜酒
疲馬再經人掩門寒已無端入山骨秋如有約問雲根
行踪忽漫增鄉思冷落西樵第幾村

邊庭何處訪騷才慄慄登臨日幾回涼似君山波始下
感深祇窖歲方催荒烟古戍蛩吟到好月今宵鴈叫來
歷歷秋河牆不隔丹林疑有倚雲栽

獵獵西風吹野垌美人遲暮耐清冷日邊若木空中撰
山上焉支分外馨笳拍文姬方晚晚錦車馮嬖亦娉婷
鴈門悵望明妃塚太息天涯爲底青

蕭條已過衆芳時
芳外尋芳出愈奇
世路蒼茫復何物
歲華點綴頗相宜
支撐節烈終留燄
矍鑠英雄別有姿
五百年前鞭鐙血
相依合種令公祠

歲功成處孰調和
爲爾歡然紀葉柯
競病將軍旋凱日
妃稀大海問遺歌
朱欄砧杵情懷遠
紫塞風雲意氣多
却笑暮年蕭瑟客
枉因司馬怨婆娑

曾于衰謝識炎涼
嘯植深恩敢或忘
曦照月臨皆帝力
霧酣風醉總秋光
本非解語凋何惜
差異卷心剝不傷
他日浮華盡刊落
獨留貞幹麗朝陽

過眼匆匆錦繡天一年好景至秋全看他傲骨殊能嫵
借爾寒威始自妍肯入季倫金粉隊只宜摩詰白雲邊
等閒得上丹青筆閣盡風霜已可憐

同人登磬鍾峯作

天風泱泱吹泠泠一峯日夜撐空青云是仙人遺磬鍾
欲墮不墮心簞簞我行四載循其麓每擬登陟防雷霆
秋空木落整腰腳忽然招我來山靈與客問道數里近
假策先叩山前扁連岡複巘互屬繹亂盤危磴紛凌兢
下馬五步一歎息攀沿始到陰之陁其陽陡下不見底

土花亂飛如霰零奇哉何年六丁削直向天門千丈落
日精月華自起伏鬼工神斧誰荒度我疑底柱移龍門
又若斗柄斡乾鑿大鵬畏擊不敢前老猿伸臂徒盱愕
待呼真宰問黃曾此峯閱世幾疆索想當鮮卑與烏桓
水草爭奪橫相干穹廬一握藉撐拄黃沙白漠催歲寒
邇來千有八百載英雄豎子皆摧殘卽今天關

神皋境羣部就瞻開

禁省此峯近矗

仙莊東搏桑萬年紅日景

峯左懸厓有桑一株

瑞烟膏露來空濛

琳宮紺宇相明靚游人快此一娛目餘雲在衣霜在嶺
下視人間秋氣深清磬一聲萬山靜

同程春廬兵部

同文

趙菊言吏部

盛奎

張柳泉戶

部

允垂

喀拉河屯登高三用杜工部藍田崔氏

莊韻時丙子九日

到眼嶙峋寫范寬雲山知我話新歡郵程共叱王尊馭
詩境同憐杜甫冠大漠烟沙將歲晏穹廬水草又秋寒
頻年顛倒題糕字許爾灤河一笑看

登高之夕春廬有詩輒和其韻

天高木落此山城山外人初攬轡行雲護

離宮開夕照水環羣嶺作秋聲青松絕塞不知老黃菊
故園空復情若向歲寒論晚節關垣迢遞感平生

三月一日入直口占

宮柳絲絲乍暖天才聞舊侶繪鑪烟是誰賦有摩空筆
顧我詩如水上船好夢低徊十年外故巢依約對門邊

對門爲科道直房

夜來禿管光芒甚曾寫絲綸到

御前

雲罩寺

石門山人集卷八
我與牟尼一笑逢果然身到最高峯四禪天近疑摩頂
七寶雲多亦盪胸指顧山河誰點筆蒼茫今古此聞鐘
夜深欲向黃曾問塔影燈光第幾重

由天成寺至萬松寺作

漸聽松濤滿耳間此中甯復是人寰泉聲太古涼雲靜
樹色長春亂石閒壘嶠幾疑無路轉危巒忽覺有梯攀
英雄劍氣菩提埵許我塵蹤一往還

直廬新闢射圃和程春廬郎中韻二首

就樹疏泉別有區甕山東去復東隅地依梵宇容飛鶴

永寧寺
之東 人隔

仙園聽曙鳥酌暇乍欣三徑爽借棲添得一枝殊夕陽
飯罷來游處慚愧勞勞執射吾

七峯深秀列周廬瀑直三年慰所居分榻又逢新築好

開樽先訂晚涼餘

同人將置酒落之

諸君取次烟霞攬顧我蹉

跎歲月虛此會明年誰健在相煩重認雪泥書

謁夷齊廟二首

我欲飛觴北海濱爲公一薦一傷神遜荒豈復論家國
就義終當有主臣萬古激揚在冠履幾人頑懦得陶甄

西山濔汔三千載景仰今朝識逸民

曾于畫史式容儀

余有李唐
采薇圖

搖落西風拜古祠地老天

荒此薇蕨漢爭唐戰又城池潔身豈獨同巢父殉國還
堪答祖伊宋代冕旒元石墨何關孤竹令名遺

和梁芷林禮部

章鉅

永平道中

萬帳垂楊外斜暉一鳥還明朝背陰堡迴望首陽山新
月澹于水暮雲寒近關河梁聞有路畏見雨痕斑

公車

拖泥帶水曳其輪扼要當前道已堙宦跡自憐同蹭蹬

詩心緣此亦因循何須擾攘爭先路終有艱難過去人
廿載雲逵幾高足天涯遲暮剩吾身

墜馬

攬轡書生笑未工風塵一墜竟匆匆漫誇作客郵程熟
多恐封侯骨相窮此日泥塗真潦倒幾人髀肉嘆英雄
絡絲鬢影相將老慚愧當年御史驄

瀋陽雨中九日四用杜藍田韻

一杯真覺海天寬酩酊秋容且自歡薪似勞人仍轉轂
菊當晚節最宜冠連綿陰雨頻催暮迢遞歸雲已戒寒

明日曉晴臺子嶺攜壺須補幾回看

滌襟泉

西風吹我到巖陰手挹泉源問素襟本以無塵忝佛偈
又將如水証臣心雨餘

蹕路迴環磴秋老禪關縹緲岑今夜澄明上方月照來
真覺入山深

澄海樓觀潮歌

海山蒼蒼天雞鳴危樓夜半高冥冥我來憑欄蕩魂魄
俯視一氣東西溟是時殘月正欲上水光雲氣相吞并

天風東來甯海城奔雷走電紛憑陵千軍萬馬忽然至
乃是大海潮來聲馮夷鞭石起幻蜃象罔駕浪扶頑鯨
初來層層倏撞擊繼以汨汨高掀騰排鎗倒戟赴大敵
挾沙飛礮驅神兵秋氣已作金鼓肅夜色不散魚龍腥
須臾東方赤鳥起一燭決潏長波平初影先度蒙汜曙
曦光漸浴咸池清氛消霧掃一瞬息瀾洞波晏來虛澄
齊州茫茫烟九點巫閭疊疊山六屏平沙璀璨出蚌蛤
遠岸隱約排檣船側身層垓立無際擬踏萬頃玻瓈行
長風泠然御之去若有人兮來相迎蓬萊方丈咫尺近

欲泊引去心屏營珠繻甲帳渺何許雲璈玉佩徒相矜
我聞秦皇此采藥徐福艫舳何年經神山仙島漫往復
童男艸女嗟飄零又聞張騫浮月至天上人間查客星
維天案戶不可叩織女機石終安憑求仙得仙者誰在
文人誕妄恆相承因思百谷水歸海東海南海同寰瀛
借爾一楫揚帆往汭流而下歸鄉局波羅之樹何亭亭
銅鼓黝黑森精靈虞戈柳骨陳諫字大書深刻韓愈名
對面仙人騎羊至錫我五穗延遐齡請語海神神其聽
此樂何減喬與鏗以我觀水水非我回頭一笑羣山青

同懷弟彌光樸園編輯

子尙忠春卿

尙志任卿校字

石雲山人詩集卷八止

石雲山人集

卷八

七

石雲山人詩集卷九

陝安集

戊寅己卯
庚辰辛巳

南海吳榮光伯榮

出廣安門口號四首

戊寅十一月十五日

辭

闕初移問俗輪

鳳城頃刻隔重闌明朝北望紅雲起猶是

樞庭橐筆辰

最憶前辰

召對時廿年奔走

聖人知却慚法吏曾何補也領關南一繡麾

四月陪都甫東扈三旬京國又西征七千里外透遲路
珍重

君恩載與行

兩厠清班兩法曹故人天上夢魂勞徇知感惠同回首
記取蘆灣夜月高

過盧仙祠

半枕繁華八十春匆匆容易證仙身幾多鴛鴦雲中影
一笑雞驢鏡裏因撒手自然皆淨土觀心原未免紅塵

不如飽吃黃梁飮夢醒仍爲行路人

趙州店有汪小竹

全德

路遇家山尊典試粵西題

壁詩時甲子六月也今山尊歸里十年小竹已
官水部矣余備兵陝安過此輒和小竹韵戊寅

十一月二十日

百折泥塗孰不磨故人青眼有高歌宦途珠璞升沈悟
客路風雲感慨多采筆商量凌曉棧靈槎迢遞隔秋河

出山未老

小竹

還山老

山尊

十五年中一瞬過

安陽至日用杜韻

十一月二十五日

征塵如幔暮鐘催令節關心歲晏來春逗粉圖應有辦
寒森香鼎欲成灰漳南旅思誰飛笛隴首鄉情待寄梅
休向天涯論風俗圍爐與客且銜杯

登萬壽閣望華山

滿空迤邐駕雲烟恰送眞青到閣前五夜星光寒玉井
三峯霜氣散金天差肩嵩少黃流斷餘勢終南翠障連
欲向山人分一掌蒼茫擎出日輪鮮

望九嶷山

峩峩九嶷山纍纍唐臣冢今古幾英豪夕陽下邱壠春

秋有代謝華屋相接踵山河誓功名風雲鼓智勇開創
見艱難承平幸供奉豈乏作楫才亦有積薪恐蓋棺各
賢奸紛紛但榮寵請看麗牲石孰與信史重願假瓊蠟
拓校讀生敬悚滿目徒荒涼嗟彼枯草茸朔風一夕來
石馬雙耳聳

馬嵬二首

延秋日暮起兵埃回首無家剩馬嵬猶是紅塵飛騎路
可曾重見荔支來

萬乘倉皇竟割恩美人搖落又招魂九華帳裏如相見

忍向梨花問淚痕

題魏忠節公

大中

孝烈先生

學海

父子遺像

有劉宗周

徐枋
二傳

魏塘曾憶拜衣冠又向圖中鄭重看
讀罷劉徐忠孝字

萬山風雪萬松寒

懷人十七首

并序

廿載京華三年樞省匆匆分節已逾五旬隴
棧連雲風雪滿谷梅花在樹鴈影橫空緬懷
故人各在天上而鬢榻相依勞歡與共者莫如
同直

諸君行邁旣遙所思愈切心儀手畫各系數言
用志依馳敢云論述時戊寅臘月廿一日也

禮部郎中王鳳翰小蓬

樞禁固多才首數我王仲

天子屢呼名曰實冠其衆小心事温室大筆繪雲棟秋
獮

較射來五發五命中

戶部郎中葉繼雯雲素

吾慕葉夫子古道照顏色萬楹曾靈光三英鄭司直新

詞如球鐙餘事乃石墨何時風穆如相望飛鴻翼

約寄贈行

詩未至

刑部主事楊振麟桂山

桂山非酒人顧亦豪于酒談辯驚四筵縱橫貫萬有尙
義時傾肝徇知或懸肘昨宵惜別離贈我好顏柳

內閣中書孫蘭枝春甫

春甫博于古偶或娛新聲篤此丹鉛契佐以裙屐情曉
牕理玉躡春院調銀箏西園嬾羣雅吾推王晉卿

工部主事吳孝銘伯新

禁中有三吳質正維伯新擁萬

吳書城

借我去今僅見斯

人巨波不清濁皎鏡無冬春我思晉處默庶幾式朝紳

兵部員外郎記名御史沈學廉壽珊

懷哉沈休文骨重神亦寒豈惟文采流行登清要官古人重獻替

天心求治安柱下一星高照汝惠文冠

禮部主事程裔采晴峯

晴峯朗照人玉立在天表優游禁闥春揮灑墨池曉大令如游龍中令如飛鳥用以書典謨此筆濡能了

內閣中書李昌平東山

東山出山時年已近謝傳落落用世心恢恢鎮物度芝泥密勿書蒞砌迴翔步努力愛華簪

天上多膏露

右頭直八人

兵部郎中程同文春廬

達人貴自我得之程先生其學貫墳典下亦窮垓京慷慨廊廟志逍遙邱壑情萬卷一燈炯

記見示夢中語

疇非太乙

精

吏部員外郎趙盛奎菊言

菊言清廟才况稟生民秀趨班

玉仗晨染翰金鋪晝借此瑚璉姿飾我郊島陋相思正
朝寒北望紅雲逗

戶部員外郎張允垂柳泉

柳泉好風裁夙夜勵三事唯阿羞隨聲澹泊自明志諸
葛惟謹慎魏公真娥媚幸我兌能孚敬哉麗澤義

刑部主事何增元申畬

吾于數君子申畬觀其淳與世各無競其氣乃如春苔

雨行園地嚴霜策蹇身願言寡吾過勉作慎言人

內閣侍讀聞人熙春臺

春臺號多聞瑰麗逢時器蘇公制誥文魯公千祿字茂
密實難過淋漓殊滿志公門一鉢傳昨歲滇南使

戶部員外郎趙光祿雨樓

雨樓蘊奇才漸已脫穎出大言與小言滿堂亦滿室有
道需經綸吾學兼華實願以論世心宏此匡時術

兵部主事徐受荃楚香

楚香本詩人陳芳得天福謫仙書萬卷真儒酒一斛投

我臭如蘭思君澹于菊最憶翦燈餘相對兩間屋

工部主事強逢泰綺園

吾愛強都尉蜚英花翎鸞弱冠入樞直有弟登詞垣
藹藹盡臣裔祁祁世祿門尙念教忠志黽勉承

國恩

禮部主事梁章鉅芷林

岬嶧七峯樓中有人亭亭學術虎觀論文字鴻都經我
憶烟霞幅能摹翰墨馨別來各無恙視此西山青
七峯別墅
有樓余入直居此今年六月芷林
來同直余以樓讓並繪圖記其事

右二直九人

己卯三月十一日恭接

恩詔三首

天上三霄露人間五色豪

六旬諸福集兩紀

聖躬勞率土同敷錫登臺各咏陶將

恩比春雨春雨看如膏

是日雨

復憶詞頭啟條條述記親臣民至纖悉

宵旰此精神密勿雲深夕承宣漢廣春觚稜重迴首半

載外移人

大母如慈母含飴四十年更欣親舍在得見

主恩全錫類臣心慰能忠父教先五花

芝檢好計日煥茅椽

高氏灌園詩和韻二首

小築依城市蕭然十笏寬疎花窺曲沼密樹護重欄物
意知魚樂禪關證鴿安攜壺有清興更卜夜游歡

竟得虛亭月澄輝攬此方天宜新雨後人對好風長竹
露蟬娟淨茶烟匝匝香今宵塵外憩肯借北牕涼

鳳嶺

此身真已御雲行
下聽浪浪暑雨聲
天外微風吹鬢冷
峯頭初日照衣明
秦綱東望曾雞祀
周室西歸憶鳳鳴
惆悵漢濱鴻鴈堵
我來何以答蒼生

再度鳳嶺疊前韻

四圍風雨一籃行
過耳泉聲復樹聲
石氣作雲隨蜿蜒
嵐光如夢未分明
客心凜凜驚獠度
天色蒼蒼任鸛鳴
回首秋霖遶潘路
勞人霜鬢感平生

查賑畢赴省棧道遇雨

手撫瘡痍卽衽餐簡書畏我又征鞍萬民已奏齊天樂
千里休辭蜀道難因我泥塗真絕險愁人溝壑又狂瀾
天心乞爲開晴早須念蒼生甫就安

查賑至畧陽縣靈巖寺拜大士像

貯得烟霞宵一壑舉頭天在萬山中雲憑石氣窺禪定
江束濤聲護梵宮誰向祇林初怖鴿我懷沮水未安鴻
觀心欲住心無住願乞慈悲普度功

盧南石尙書

陰溥

六十壽詩四首

生辰在九月

詔改于十

月
賜壽

帝念同心六艷年介眉喜共小陽天弧依

日月三霄麗履聽星辰五夜虔四海慶甘分

玉膳

九重翰墨煥瑤椽樞帷我識

昇平業曾向挑燈

禁闥前

如此

明良得幾人九年鈞軸契逾新

朝端合贊

唐虞典海內皆知稷契身造膝

堂廉論獻秘關心農婦雨暘勻知公特費

天心簡十八科前一个臣

菊節松根閱茂齡八方郵傳幾回經本爲天下文章祖
並作人間福德星探袖民艱通

黼座傳衣公望半

彤庭不才如我鹽車困也費孫陽眼一青

宗岱峯高德水長今年冬愛勝秋光月逢

國慶同家慶

天許平章應

上章鴻案六珈同燕喜鯉庭三策舉賢良蒼生久望調

元福豫繪春臺報阜康

以金人春臺
熙皞圖爲壽

鳳嶺再疊前韻

東風隨我踏春行度盡斜陽衆樹聲百道蘿烟沿澗碧
四圍松雪對山明依微古寺鐘初動縹緲荒屯角乍鳴
西望鳳巢最深處路人遙指夕嵐生

偕鄧嶠筠太守

廷楨

移唐馮尙書碑至碑洞作

碑爲

柳誠
懸書

何人始變山陰池巖巖魯郡初哉基再變卽爲元和脚
右版照耀光四夷我來西京游太學端甫塔石名空垂
此外尙有僅存者魏公苻公崔太師俗工磨洗日以遠
如形附影神先離明倫堂外秋霏霽幾家垣壁相傾欹
有光熊熊自東起衡門之右牆之厓刮苔剔蘚漸見字
東川節度尙書碑晉陽文字河東楷健筆一掃何淋漓
萬年縣郭開元土幾經轉徙依人籬童也敲火牛礪角
猪以爲圈雞同埒急走京兆長揖告豈哀其窮運轉之
東風吹春泮水湄墨香漱澹韶光遲是日釋菜習禮竟

導我碑林觀所移樂毅豈復置屏脚蘭亭畢竟歸漕司
摩挲拂拭慎撫拓墨卿楮客紛吁嘻雨洗斜陽照愈炯
寒霜太白芒尤奇取以吾家舊本較神采鋒穎爭毫絲
想當礪石下筆時心正筆正凝神思紫絲一靱孰寄遠
赤箭五兩能扶衰昔也何晦今何顯遙遙千載風燈馳
說置左右舉版築奚當富貴歌戾戾四座有客爭好事
隨喜贊嘆無浮詞僉曰太守力所及請爲退老開涕洟
孫退谷云此碑幾成沒字捫之輒爲流涕其實碑並未剝蝕也幼安之石舊有例三日
不去吾非癡吁嗟從此轍則滿空齋萬手喧璫鉦甘泉

先竭木先伐人物互盜非吾欺鴻飛已冥弋何篡雞其
自憚爲人犧敬語太守三嘆息德我罪我烏乎知但取
萬本足秘笈歸來虹氣夜夜冲門楣

題滇南龍潭唐梅圖卷二首

暢好巡檐笑吟詩幾輩來遙遙千載上歲歲萬花開遺
事開元土何人大歷才龍潭如未睡誰乞夜珠回
偶爾著泥雪名花屬使君天仍留古月人恰似閒雲流
水今朝是春風昨夜分三生緣豈在苔石與殷勤

萬春村

洋縣地名

數家烟火傍高原綠水青山恰到門正是東風桃李候
踏春人過萬春村

度漢水

嶠冢東來此淼淪茫茫禹蹟溯艱辛已占赤伏歸真主
誰見明璫贈美人南派騷才添沅澧西流王氣竟巴岷
英雄名士都磨滅怱悵春風一問津

出鎮安縣城東南十五里亂山巉巖土人鑿山腰
爲磴道以上名曰雞上架

除是飛來不憚高層層攀引較分毫忽驚架閣千盤磴

自訝雲霄一羽毛悅性山梁能審視快心天路此翔翺
頻年履險吾生慣想到人犧意重勞

道中所見卽物起興

自我青門來桃花處處有天上豈不種道旁誰攀手寂
寞浣紗人放誕當鱸酒蹇誰惜春心爲爾徘徊久

右桃花

十里春山麓五里春水濱春風吹柳枝不覺長于人嗟
我行役久願此韶華新流鶯從東來語我及芳辰

右柳

山上杏花白山田人出耕冷風泛清畎好雨開新晴古
墓夕陽入荒村春漲生客心感逶遲相將近清明

右杏花

天涯誰憐汝使汝年年綠
怱怱馬蹄痕蒼涼大道曲歲
華與行蹤可感不可觸迷陽復迷陽請勿傷吾足

右草

度秦嶺

秦嶺不一其處以此孝
義廳秦嶺爲最高之境

終南何嵒嵒東來臨此嶺下以界秦蜀上以捫參井我
行積雪後縮風度寒影峭壁驚夤緣畏途雜榛梗百夫

引籃輿一步一延頸亂磧夾冰澌有力不可逞失足于
仍落性命爭俄頃挽手聲正喧懸坐息愈屏竭蹙陟其
巔艱危各相幸乍撥雲霧重漸覺衣裳冷白日自浩浩
恐復非人境蒼蒼呼吸通默默垂堂警俯視路巉巖山
背澹斜景出險惟心亨捫袞願三省

將至興安郡城喜雨作

分得終南翠黛勻濛濛千里淨纖塵高天乍洗峯巒靚
大地重添草木春豈我隨車孚靈霖有人沿磴嘆逡巡
關心正爲謀民食恰喜山田一例新

定軍山拜諸葛武侯墓二首

一杯歲歲築遺民拜手青山感此身
三顧風雲開草昧千秋魚水有君臣
曹丕漫比英雄畧仲達應貽婦女巾
說到鞠躬公竟死孤忠何處哭巴峴

檜柏森森杜宇悲漢家王業繫安危
中原未復天應泣後主非愚國可支
瘁盡三分終不祀涕深兩表是何時
關張無命姜維莽空負褒斜六出師

庚辰二月廿七日齋禱太白山神得雨喜誌

乍脫征衣望澤頻名山虔禱及茲辰
可憐二麥芃芃日

竟得三霄益益春潤借神泉資灌溉氣分仙嶠與瀟淪
明朝隴棧催耕過共話田家畚耜新

寄和程春廬郎中會典館書成述懷韻

辛巳

貯腹經綸劇治絲每占佳夢最相思

春廬常夢滿腹鐵絲一一抽數

廿

年論述操觚久一代文章數筭知可有舊巢畱眷戀况
當

新運覩威儀書成莫向滄江去好以周官佐

聖時

文芝厓夫子持節西藏入棧有詩和韻奉答

同雲萬岫正微濛暫假程門立雪中石棧峻嶒勞叱馭
繡裳迢遞佇歸鴻公如若木終擎日我豈爰居識避風
深感一言知白守世途何事任飛雄

陝安道署古松千年物也嚴樂園觀察

如煜

偕僚

友礪石求詩臨別走筆二首

終南圍萬蒼分我一嘉樹結根庭院幽歲月不知數虬
蟻能屈伸陰陽自布濩浪浪吹天風其下有神霧忽覺
衣袂清嵐翠浩如霆嗟汝棟梁才投此烟霞痼相依歲
寒心歲寒已再度

我來朔風寒我去東風暄寒見百卉衰暄見百卉蕃與
汝獨不改落落落朝與昏翳蒼如有靈閼人云孔繁我豈
德水旣庶爾貞幹存他日惠思我何者終不諉眎柯各
無言春光在西園

過山河堰

兩載經營地三時黍稻場堰渠開鄭白父老說龔黃褒
水千源遠梁山萬疊蒼此行長別汝猶認是巡方

入棧

春風初拂試憑鞍千里關山馬首看九越棧雲猶說險

可知蜀道古來難

雞頭關

萬山圍平蒼與我兩年住時時振策游忘險爲涉趣茲
行計出險首此撥烟霧何年天雞來昂幘但東顧衆峯
如培塿凌雜相迴互嵐氣各晴陰澗雲自凝洄危途一
綫懸竭蹶勉前赴旁伺山魅喜下瞰濁浪怒盤桓復盤
桓目眩神亦怖豁然得開朗升天豈無路巴山快西眺
漢水渺東注蒼蒼楚望雲歷歷秦川樹張良一炬後誰
復啟篳路巖巖石門開鄙守棧閣厝斷峽蛟龍走健筆

神鬼護卽今已榛蕪功德終無數可知山水靈亦藉文人鑄迴首大荒西春烟起孤戍

寒溪夜漲二首

一作韓溪是蕭相國追及淮陰侯處

獲落英雄路胡爲識此人棄才知己淚岐路出亡身颯颯風雲氣茫茫客旅津至今溪畔過古月照齋淪

秦楚此才絕竟歸隆準公人皆驚大將天與掃羣雄慷慨登壇日飛揚沛乘風薦賢丞相事嗟爾竟藏弓

畫眉關

林深箐密鳥聲閒又得天然一角山初日瞳瞳照雙鬢

畫眉人過畫眉關

留侯辟穀處

功名唾手原易得功名著手亦易失丈夫報主志已伸
寵利居成復何必龍爭虎鬥秦漢間先生遇主相依攀
報韓報漢大業定此身可以還空山水石君臣世有幾
先生籌策宜疊疊苑枯迭嬪誰能停先生歸去何冥冥
功名不居乃不失青史留與青山青春風吹香古柏紫
先生祠廟烟霞裏功成身退卽神仙休問有無赤松子
君不見良弓走狗誠可悲人指韓溪有涕洟

鳳嶺

去歲度嶺行下方暑雨上方晴今歲與嶺別下方冷雨
上方雪兩年九度經此嶺僕夫汗漿馬汗血納納乾坤
如許寬嗟我長年此脆脆大風怒號從天來亂石欲墮
聲奔雷五丁神槩巨靈斧胡不平削如埏埴蟻曲蛇盤
百絳曳秋毫性命爭磨摧到此絕恐非人世手拂雲霧
峯巒開千穴虎狼嘯萬壑猿猱哀鳳皇一去不復回朝
陽梧桐安在哉南岐峯勢來蹠踐西岐羣青遠相躡東
封一老嘆衰遲何處狂歌楚興接兩當北去古陳倉霸

圖山色何茫茫寶雞叫後金人鑄從此長城空自長驪
山蒼蒼汧渭碧羌渝迴接巴岷驛二千餘里三千年幾
輩英雄但陳迹吁嗟乎沙蟲猿鶴皆可歎不獨書生行
路難登高一望百端集惟見崔嵬峻嶺斜陽殘

鳳嶺小憩

忽覺別離色黯然春滿林逶遲行客路去住看山心今

日泉仍潔前宵雨更深

十八日雨

東風勞送我恐負此棠陰

將出棧夜夢雙畫眉手獲其一乃黃鶯也詩以紀

之正月廿三日

畫眉人喜得鶯求攜爾相將出谷幽他日懷山重有夢
萬山深處一回頭

煎茶坪

古磴百萬級繚繞煎茶坪欲上仍盤桓身世何屏營雙
絙百夫曳一落千丈輕寒漸與雜還亂石相支撐喘息
陟其巔尺地如掌平土屋八九家暝烟起爐鎗行道亦
載渴及此新茶烹估客爾何來千里攀峻嶒錐刀誠幾
何失足命已傾樵子爾何來雲裏紛丁丁日暮胡不歸
虎豹伺猙獰戍夫爾何來荷戈此長征秦關與漢月忍

矣劬勞生此地扼秦吭昔人幾戰爭南望和尙原西望
氏王城陰風燃野燐白日窺山精至今閱千年但聞猿
狖鳴一水東西流渭漢分縱橫東行十餘里瀑布來琴
箏去去觀自在度人禪梵聲

東爲觀音
堂多瀑布

大散關西望棧道諸山作

五百里峯巒到此勢一蓄絡繹復東向散作大平陸近
帶渭水滌遠護驪山曲開此漢唐京千年互起伏大業
在宇宙人文滿谿谷我從此山來兩載循山麓古人各
凌替餘風見草木惟喜山泉清而有山田沃今辭此山

去爲山手一肅山靈如有情羣青送以目他日懷山心
視此春草綠茫茫下巉巖今夕寶雞宿

過大散關

行遍千山與萬山山山與我送將還頻年迴首勞人鬢
幾度春風過散關

棧道十首

北去連雲棧高皇入漢程

此今棧道也棧道之見于史書實始此

褒斜山

愈峻汧渭水長清寂寞野花發淒迷巖草生虎爭龍戰
地留我踏春行

一炬張良智示人無復東當年已榛梗此計見英雄日
月七盤上風雲兩谷中到今二千載閣道盡開通

險絕觀音碣燒治

平

記上官波聲飛樹杪峯影落雲端

叠叠青天近荒荒白日寒登臨爾無患

賈大司馬勒石語

勒壁

後人看

廿四馬鞍嶺陂陀此最紛亂山狼虎穴豐草兎狐羣緝
道塵方起嶢關日又曛紫金河畔過嗚咽不堪聞
繚繞青橋水嵯峨紫柏山天容參井歷地阻雍梁間大
將寒溪老神仙叠嶂間絕憐連理木生近畫眉關

百折嶽空度千尋性命輕嶺高鳴驚驚巖老伏蛟鯨平
衍黃牛堡蒼茫白馬城氏羌多聚落渺渺漢流聲

四萬載蠶叢何年秦塞通鬼雄爭割據人事亦雞蟲大
散關迤北嘉陵水不東吾家多將畧百戰在饒風

謂武安王

兄弟

別憶三秦定淮陰出兩當旌旗飛故道烽火照陳倉厥
後修斜峪危途始武鄉槐牙誇捷徑往往利民商

兩處均非

今棧道

唐宗兩幸蜀取道樂城原隘走洋梁險關連灑駱昏山

川鸚鵡語家國杜鵑魂亦解搜遺跡荒蕪不足論

此亦非今

棧道

也

往者山南道妖氛出沒場磨旋競螻螳盡聚較饑穰

屋方今有梯田正屢康臨岐思設險所守在循良

已卯冬與

蔣礪堂制軍夜話慨然謂添一用兵守險之人不如添一善拊循使永不用兵之人也

南棧自金堆塘至接官亭百七十餘里陝安道所

轄開春擬往巡閱以量移未果紀以二詩

十驛褒斜過千源沔漢來平蒼大野合積翠亂峯開雨
氣氏城暗波聲熨道哀巖疆誰料理魚杜信雄才

西去五丁峽東連太乙都重關分隴蜀萬壑走夔巫暮
笛三巴起荒筇一戍孤壯游吾未盡徑欲問樵夫

五丈原

天意三分國臣心五丈原山河千古淚統緒兩朝尊北
伐先皇志西歸上將魂大星何處落夜夜叫哀猿

茂陵

休向昆明問劫灰漢朝陵墓對山開力通東海無靈藥
運關西京有異才白虎荒涼文士觀青鸞迢遞美人臺
可憐絕徼窮兵後留得春風杯土哀

馬嵬

國未全傾命已傾
生生空自誓長生
蛾眉宛轉千秋慘
龍馭倉皇一死輕
幾見割恩誅妹姐
徒聞傷逝訪蓬瀛
西巴冷雨南宮月
贏得三郎薄倖名

秦

一擊虛驚博浪沙
輶輳終返祖龍車
人思出郭牽黃犬
鬼泣當途斬白蛇
六國故宮空蔓草
二川流水自蒹葭
忽諸休爲秦非惜
奇貨當年是呂家

藍橋早食

一飯藍橋路勞人慰渴饑亂灘流水急古磴白雲歸社
近村頭暖山深戶口稀瓊漿何處乞寂寞野春微

藍關

藍關莫悵雪交加浩氣雄文在海涯一表未投摩利骨
七言先識牡丹花仙踪寂寞荒山老客夢迢遙驛路斜
此去較公無別恨八千閭越近吾家

七盤山

我從大地來兀律見羣嶂蒼然高矗天百夫盱相望延
緣稍得路曳我籃輿向羊腸紛百折螳曲窮萬狀高者

或沿崖下者如入藏磴道豈止七稱名何其妄繚繞數十盤稍喜得開暢左挹玉山秀右瞰藍水漾商顏六百里東去觀則壯我行三十日日日終南傍春光感鬢殘雲影或胸盪雖則風塵勞亦得烟霞餉草色如有知爲我誌行緬

過輞川

谷口蒼茫起暮烟烟寒人渺水淪漣此行愧乏王裴筆春色匆匆過輞川

玉山

秦女顏如花朝朝惜歲華詩人歌木李詞客感匏瓜
日出耕烟地雲深種石家神仙須結佩迴首玉山斜

秦嶺弔韓吏部

此商州秦嶺也

陂陀百里趨到此不唐突我行陟其巔其下萬丈率平
皋凍雲起亂磧餘冰滑緬懷唐諫臣行邁此焉越殘年
不足惜觚稜望雙闕佛骨尙未投何處收公骨冥冥瘴
海烟渺渺秦關月迢迢南國路脉脉東風發好春前日
來古芳亦未歇今我方叱馭

君恩等蓬渤無畏此厓屨出險破脆隤隔嶺聞鐘聲一

夜生華髮

過四皓墓

愛姬弱子困而公一假先生建立功
羽翼已成千里鵠
風雲終返故山鴻
君王嫚罵人先避
巖壑徵求路豈通
果否漢家曾應辟
欲詢遺跡但蒿蓬

商山

不見雪中人但識雪中字

每雪晴山椒
現一商字

昨日春雪深今

日晴烟翠紫芝在何許白石空自媚
東去望隆中臥龍

已顛顚

青山宋柳邵康節所植

一樹青山脚底眠，衆山無此好雲烟。
可憐擊壤閒中植，綰得春風七百年。

陽城驛

唐避御史陽城諱改爲富水驛

一泓富水向東流，忽憶青驄陽道州。
終古逝川名姓在，路人遙指避賢郵。

商於

商於迤邐古巖疆，秦楚當年百戰場。
丹水千波悲帝子，

青山六里笑懷王。

崔融詩六里青山天下笑

中原割據英雄盡，南國

離騷草木香今日

太平經此地春風如錦柳絲長

過四道嶺書所見二首

又是羊腸第幾迴無端春色逐人來
勞塵擾擾空山靜惟有野花相對開

疎疎紅樹野人家却伴春風二月花
杏白桃緋新柳綠山中容爾鬪繁華

荆紫關

天開平野接荆蠻莽莽春風度此關
一水東來連楚鄧

萬峯西去繞商顏
沙隄草樹連波遠
村舍桃花對岸閒
回首秦梁行客路
爲吾添得鬢毛斑

蠅

黑白爾何意
炎涼世自工
正妨君子信
爲辯小人同
樊棘深嚴地
脂膏擾攘中
夢覺天末有
飛鴻

江口

扁舟才渡水
潏潏獨立蒼茫棹
一停碧漢丹江相對出
春風看到楚山青

峴山

雲雲山人集

卷九

三

少作峴山詩頗見傳鄉里今從峴山過身世徒倚江
山自終古雄才誰料理人去山已空山在人不死春風
吹綠苔印我好屐齒前蹤不可追憂患自今始寒松歲
歲青朝菌日日萎茫茫千載上擾擾百年裏明明襄城
月脉脉漢江水茲山幾人來疇繼羊叔子

附少作

峴山懷古

巳酉社題

漢南雪樹鎖秋光太傅祠邊日又黃游客有魂歸峴
首青山餘淚灑襄陽兩朝未盡元戎策十載空傳勝

地觴合祀至今惟杜父姓名歌泣與江長

襄陽懷古二首

唱徹銅鞮大道陰襄陽耆舊故難尋人思羊杜青山老
世閱孫曹碧漢深諸葛臥龍徒想像景升肫犬亦消沈
憑高西望金城莫千里悲涼上堵吟

漢皋十里接均州幾處魚梁宿霧收估客千檣落樊口
詩人一水釣槎頭檀溪寺古叅泡影石井闌空剩土邱
欲向習家池上醉宜城佳醞最風流

桃花夫人廟三首

楚宮歸後寵方新
送抱推衾感事人
開到桃花春色冶
花中應自悟前身

桃花人面兩淒迷
相對無言夕照西
一樣春風亡國恨
好花終自憶虞兮

傾國傾城幾逝川
美人終古惜流年
紅顏忍死從飄泊
爲爾臨風一惘然

黃鶴樓二首

好風吹送一登樓
何事仙人不暫留
雲影古今過鄂渚
江聲日夜走黃州
極天波浪誰同濟

是日候風過江
異地烟花

我欲愁西去荆門閒戰壘幾家漁網夕陽收

我欲飛仙跨鶴回手吹玉笛暮雲開依然城郭三春日

如此江山幾代才鸚鵡洲荒名士盡桃花宮冷美人哀

郎嬌廟在漢陽只餘大別峯前月照徹滄桑夜夜來

武昌弔桂文敏尙書芳

三世魂招鄂渚郊那堪芻狗重呶呶君祖以庚戌父以壬戌君以甲戌均

終于武昌君卒時四十二歲四句教歷尙書履七載淒涼使者旃君

己七年公望早推溫室樹君與子同舉進士君詩有須知溫室樹終待鳳鸞聲爲主司所

賞我生何意楚江鮑痛心十六年前友但作尋常文字

交

月湖修禊

東風吹芳草綠到漢江渚南國美人盡無賴見游女茫
茫此月湖藻荇泛烟渚長隄紛桃柳曲岸或桑苧江漢
俗好游况是踏青侶雖云不可求相諠何延佇春如溱
洧渙人競秉簡與而我攜客來悵然感羈旅攬巾喜清
流躡屐得雙嶼琴臺虛衆籟祇園自寒暑盃觴亦胡爲
及此新茗煮形骸忘放浪山川共深阻悠悠百年間懷
古誰與語不如倚棹還暢讀永和敘

楚

亂峯無數大江東七澤微茫夕照中山鬼薜蘿湘女竹
美人雲雨大王風騷才屈宋眞千古霸業荆蠻亦一雄
畢竟人心三戶在亡秦當日惜匆匆

黃州口號

何人得似周公瑾生子當如孫仲謀赤壁風烟豪傑盡
江聲送我過黃州

過大姑山

匡廬一點好烟鬟飛到湖心翠影閒細雨微茫孤棹路

舟人遙指大姑山

舟泊五老峯下

烟雨湖心春棹催晚晴西岫好風來看山忽憶坡仙語
五老蒼顏一笑開

望廬山

曉棹望西南一氣烟雲變橫嶺與側峯相近不相見萬
疊鬱騰湧時有紫嵐現及午行十里好風浩相扇烟開
雲亦空始識匡廬面昂藏五老峯縹緲仙公院長橋亘
三峽飛瀑但一綫諸峯赤日寒衆壑好春絢我行欲登

山迷途卜以先今茲得豁朗知兔山靈譴請從此裹糧
詰且腰脚便便當凌絕頂一攬大滄徧睇髮天池阿濯
足玉淵淀下視人寰中駒影疾于箭

瞻雲寺

古歸
宗寺

襤被入匡廬延緣至南麓數里幾村舍春風策黃犢曲
堤多芳草古澗媚修竹漸覺蒼以森嵐氣滿初服戢戢
金輪頂凜凜塔影矗此處非人到何年負鐵築赤髭鼓
神力運斤如風速遂使空中成坐與雲分屋
千峯頂上
一間屋老
僧半間雲半間夜半雲隨風雨去到頭不
及老僧閒此宋志芝庵主金輪峯偈也
其下有古寺

一燈聚禪族法幢獅象來鬼牆魑魅伏至今越千年衲
子但五六我來問覺路差可辨巖谷青松誰社壇紅杏
自林木白雲滿空山今夕何處宿

右軍墨池

老衲導我往云是右軍池在昔舍宅後留此清漣漪古
墨已就湮宗風何處追想其奮健筆萬籟鸞溪湄雲烟
盪胸次巖壑爭魁竒當年亦遊戲已作千秋師分派出
衛鑠溯源窮張芝詰嗣豈勝藍外人那不知蕭羊沿其
流虞褚循其涯歐顏各有本米薛誰深窺下逮趙王孫

一氣相漫漶其餘紛紛者側出皆旁支翰墨雖小道挹
注何淋漓修禊感懷日登邱慷慨時俗眼第知書古人
良足悲我欲問古人逝者不可期蒼波動春色綠篠添
新姿去去勿復道山水方吾滋

瞻雲寺口號

紛紛巖竇滿烟蘿誰向曹溪問達摩三十六宗隨世盡
八山惟見塔幢多

由瞻雲寺至黃巖寺神仙洞

一氣互紆鬱衆壑爭陰晴烟霞各自媚燦若錦繡明丹

垠旣翕施翠嶂方崢嶸東南屏風張一一跨頂行峽斷

忽得路峯多難悉名杳窈彭蠡湖屬繹漢陽坪雙劍峯名

倚天外蒼茫來鶴鳴峯名其下多瀑練沿厓隨送迎浩浩

白日靜但聞琴筑聲散僧亂峽出古寺飛泉橫及爾煎

活水餉我舉新萌堂密寬可坐中有雲英英借問洞中

人何年丹始成

文殊塔觀瀑

高三十餘丈

我觀泰岱泉夏涌冬則涸又抱蜀棧雲潤不及垠壑茲
行陟黃巖快哉心目廓廬山挺中幹漢陽自東作四面

走枝峯峯頂多瀾洑鶴鳴與龜背

峯名

諸水滙衆嶸到此

始一瀉其勢愈磅礴何來三十丈散漫千絲絡白龍九
闔下萬里摧閃鑠赤日動光華之而五色錯其餘爪與
沫風霆亂霏霍千聲震巖谷萬息鼓橐籥疑無地軸盛
豈有天漠落鬼神夜夜守浩瀚不可度我欲跨之去目
瞶足先却滔滔無底潭冥冥誰能勾下出青玉峽滙作
雙龍蹕回首溯高源身世但惶愕不如挹其流沿徑訪
層壑夕陽下峻嶺老樹倚林薄我佛自聲聞塔影森如

削

宿秀峯寺

古開先寺

萬瀑聲飛萬木參法輪轉到幾伽藍讀書臺冷餘初地

漱玉亭荒見古潭

蘇文忠詩古潭搖青空

山待歸人終寂寞水流

今日信清甘

蘇詩垂瓶得清甘

屏風九疊張如錦許我眠雲一

夜酣

秀峯寺月夜龍池觀瀑

水飛黃巖峯亘如龍垂天水到青玉峽猛如龍戲淵東
西雙白龍飛鳴來山巔蜿蜒注龍池風雷紛喧闐殷地
尚動盪搖空見澄鮮何人懸玻璃納入世大千清冷玉

宮闕晃漾銀垓埏瑤華日夕生芝草幽且妍有客坐盤陀深夜蒲團圓結璘不可階雲海空無邊回頭月正中

香爐

峯名起寒烟

秀峯寺宋牧仲所施五代人畫地獄變相圖卷真蹟黃山谷書七佛偈殘壁王文成公擒宸濠紀功刻石余定爲三絕各系小詩

因緣了了問瞿曇修到人天各自諳濁溷錦裯從墮落大家回首揭羅藍 右變相圖

摩挲殘壁黯荒烟寫得迦陀幾字傳梵唄滿天明月出

欲從雙井叩書禪 右七佛偈

嘉靖邦家此大書君王原爲手倅渠漫勞闕下親征詔
元帥功成本未居 右紀功刻石

萬杉寺

晨策度叢薄春風蕤以深緬懷種杉人蒼蒼何處尋萬
綠自委地但見萌芽森禪宗幾興廢山色長嶮欽願假
十年植四圍羅清陰雲水識初地烟霞歸故林箕踞看
白眼趺跏開素襟更上慶雲峯間關聽鳴禽

五指樟

一根五樹如掌心五指
高聳之勢在萬杉寺前

以指喻非指生心卽住心何人攜五老把臂入空林托
月夜方永拈花春迸深怪他仙掌好膏露正沈沈

三峽橋

何處來琴心大壑迴長風九十九泉澗瀉此衆石猗猗
口滙于南園山峙其東杲杲日初出飛梁氣如虹俯瞰
百餘尺巨濤相搖沖峽底起神雨衆竊喧晴空雹車雜
霆霰霽軸奔雪霰霰雲爾澹清晝林谷皆溟濛玉淵聚寒
冽金井開沖融恍然浸太清能寫商與宮安得水仙操
一唱三嘆中此意復誰知還問大明公

棲賢寺僧刊寶石爲舍利輒示游客以博香錢余
不欲言其僞也作詩紀之

佛法戒誕妄轉日滋其僞五蘊各自照何必真舍利布
施各日分去任汝以爲餌欲辯在無辯辯恐傷吾智

謁廬山神祠

在白竹庵

泉聲樹色杳森沈白鹿黃龍自古今衡嶽一枝開大阜
彭湖三面照諸岑七賢屏幃幾時闢五老峯巒何處深
稽首山靈邀宿諾他年重許布鞋尋

白竹庵

到處烟雲應接忙
山腰爲爾一褰裳
龍團試後微風好
亭午剛聞白竹香

由白竹庵至木瓜洞

不覺入山深
空翠無人跡
但向佳處行
荒榛手自闢
雲來濕我衣
風來送我屐
萬松忽蒼森
古洞日自夕
洞中一老人
坐對五峯碧
五峯歲歲碧
蒲團今幾易

洞對五老峯老

人年九十一歲

五老峯歌

五老峯于白石院觀之最真切白石院卽李公擇白石山房故址也

欲識廬山面
遠問李公擇
欽崎寶陀巖
讀書有故宅
我

行不易到攀沿幾振策烟霞生足底風泉蕩心魄僕夫
爲我言五老紛緯畫世人皆欲見往往被雲隔今日笑
顏開或是山靈格請爲識其形長歌告游屐一老特權

奇西顧正卓鳥傍聽獅子吼

西傍有獅子巖

大衆盡辟易二老

稍遠立徜徉青襪襪風雨任櫛沐母乃渭濱客其三與

四五東顧相屬繹三老軒左袂近挹日光赤四老愈昂

藏鮐背神奕奕五老倚紫霄

峯名

去之不盈尺或差浮邱

肩或岸通天幘俯或霞標撐仰或星斗摘真氣各爛漫
萬象互翕闢餘峯如兒孫點領日增益乾岡笏笏高天

池夜夜碧紅塵在人間去來渺無迹惟見重湖圓世界
幾潮汐我聞神游河詎意來山脊又聞星入昴何年出
巖隙居豈五鳳樓供合五羊石仙人偶游戲智者空探
索絕仍追雲踪天邊多露液萬齡得芝草千年種杉柏
山中早歸來勿令頭先白

白石院

李公擇
讀書處

文字九千卷巖巒八百年幾人誤簪紱此地好林泉世
上風雲滿山中歲月遷楞伽多白石未許醉來眠

李公
擇在

朝以詩寄庵端老云煩師爲掃山中
石待請歸時欲醉眠然竟不克歸

宿白鹿洞二首

萬松鬱烟嵐斜陽度層嶺春風吹澗來恐是沂雩境尙
想子朱子簞笈此焉領至樂尋孔顏吾道得伊潁匡山
好雲泉暇日恣游騁至今六百年飛瀑如雪冷此洞容
幾輩來者各自省但有新建伯老桂撐簷景有王文成
手植桂
新亭滿山色衆樹窺潭影忽憶江門深今夜月華靚白
沙

先生爲文成高弟吾
鄉先哲故連及之

吾懷李賓客何年馴鹿來三疊泉自環五老峯正開萬

山與萬卷

李渤號
李萬卷

輝映思賢臺至今橫舍間書聲終夜

催古人日已遠紛紛誰仙才今夜好月出乃在山之隈
照我門前峽終古聲奔雷珠玉灑咳唾冰雪濺塵埃誰
咒此清冷使我胸懷恢便當挽銀河手挹天斗魁回頭
望羣山古色青崔嵬

謁張睢陽廟

虜賊傾唐室英雄起雍邱孤軍鳴大義一死誓同仇號
始吳王署兵兼單父收艱難成衆志保聚得奇謀三穴
虹摧堞千篙蟻沸油力窮能借矢傷重亦援枹狗彘降
人面謂令狐潮鉄肝六將頭先聲首焚柵衆士勵椎牛遂秉

河南節期分洛北憂江淮資保障澎濮扼咽喉大勇雷

郎將謂雷萬春同心許郡侯許遠風雲長齊勝鼙鼓亦蒙庥官

告虛王請軍儲轉盜賙元戎終齒碎疲卒半魂游四面

悲危壘羣聲哭納溝析骸剩鳩鵠披膽尙貔貅成敗觀

三帥烽烟逼數州萬鋒衝陣過一使哭庭求南霽雲指齧

應徒泣脣亡自不尤嚴圍爭頃刻飛檄又稽留謂間邱曉慷

慨孤臣淚飛揚厲鬼矛陰風斜日莫怒魄大江流俎豆

芳祠在功名信史修用李翰語卽今慙李翰列傳紀先猷

同懷弟彌光樸園編輯

子尙忠春卿

尙志任卿校字

石雲山人詩集卷九止